

La surfabricaziun Curtin Tarasp es realisada

Di da las portas avertas i'll'ündeschavla fracziun da Tarasp

La Cooperativa da fabrica Curtin Tarasp ha realisà illa zona da fabrica Curtin per var nouv milliuns francs duos chasas cun 17 abitaziuns d'aigna proprietà ed abitaziuns da fittar. In sonda passada ha gnü lö il di da las portas avertas.

La zona da fabrica a Curtin Tarasp exista fingià daspö bundant vainch ons, però l'interess da fabricar es stat fin avant duos ons fich pitschen. Perquai ha la suprastanza cumünala da Tarasp decis da d'vantar activa. Ella ha proponü ad üna radunanza cumünala da l'avuost 2010 cha'l cumün as partecipescha ad üna cooperativa da fabrica. La radunanza ha deliberà ün import da 15000 francs per examinar las pussibilitats per realisar üna surfabricaziun a mans d'üna concorrenza cun tschinch büros d'architectura. L'idea dal büro Fanzun da Cuira ha lura chattà la simpatia da la cooperativa.

«Cun impraists dal cumün e da las bancas, cullas parzias da la cooperativa e culla vendita d'abitaziuns vaina lura pudü rablar insembel la munaida per garantir la finanziaziun dal proget», ha dit il capo da Tarasp Christian Fanzun. La fin october 2012 s'haja lura cumanzà a fabricar ed in sonda passada ha gnü lö il di da las portas avertas. La surfabricaziun spordscha 17 abitaziuns d'abitar e d'aigna proprietà da la grondezza dal studio fin pro l'abitaziun da tschinch stanzas e mez. «Il di da las portas avertas es stat fich bain visità e la risonanza es statta fich buna. Da las 17 abitaziuns sun amo trais libras», ha dit Christian Fanzun in sonda.

Intent da ringiuvnr la populaziun

A Tarasp abitan fich bleras personas plü veglias e l'intent da drivir üna zona a Curtin d'eira impustüt quel da pussibilitar a famiglias giuvnas da fabricar a Tarasp e da manar nouva vita in cumün. Cun quai cha quel böt nun es gnü raggiunt, es gnüda fundada cun la partecipaziun dal cumün la Cooperativa da fabrica chi ha uossa realisà l'idea. «Il cu-

mün ha cumprà as seis temp sito Curtin il terrain e miss quel in üna zona da fabrica. In ün prüm pass ha il cumün realisà l'infrastructura necessaria cun lincias da chanalisaziun, d'aua ed electricità e culla via pella nouva zona, ha manzunà Fanzun.

Culla surfabricaziun Curtin ha il cumün raggiunt il böt ed insembel culs abitants da duos chasas privatas abitan uossa famiglias giuvnas cun uffants a Tarasp. Quai ha eir per consequenza cha la scoula primara sarà garantida pels prossems ons.

Ündeschavla fracziun da Tarasp

«Nus vain previs da principi davent d'impedir il trafic d'autos tras la nouva zona e perquai planisà a l'entrada da la zona üna garascha suotterrana», ha dit Christian Fanzun. Ch'intant gnia realisà eir quel proget chi spordscha 28 plazzas da parcar pella zona Curtin, uschè Fanzun. Cun quai es nada l'ündeschavla fracziun dal cumün da Tarasp e quai immez cumün aint illa fracziun da Fontana in vicinanza da scoula, posta e butia.

(anr/bcs)



La surfabricaziun Curtin a Tarasp.

fotografia: Benedict Stecher